

**Inatsisartunut qinersisarneq pillugu Inatsisartut inatsisaat nr. 14, 2020-mi novembarip 24-ani atuuttoq allanngortinniarlugu, taamaalilluni § 1-imi najugaqarnissamut piumasaqaat maannakkut qaammatini arfinilinni najugaqarnissamik piumasaqaammut sanilliullugu annertuumik sivitsortillugu, qinersisinnaatitaalernissamut Kalaallit Nunaannut ataavartumik nukittunerusumillu attuumassuteqarneq qulakkeerniarlugu Naalakkersuisut peqquneqarnissaannik aalajangiiffigisassaattut siunnersuut. Inatsisissatut siunnersuut UPA2027-mi kingusinnerpaamik saqqummiunneqassaaq.**

(Inatsisartunut ilaasortaq Kuno Fencker, Naleraq)

### **Siullermeerneqarnera**

Siulittaasoq qujanaq.

Maani nunami. Kalaallit Nunaanni.

Inatsimmik tunngaveqarpugut. Namminersorneq pillugu Inatsit.

Partiitta pilersitsisua Hans Enokseni, eqqaaneqarnera ataqqinartuuli,

Inatsisitigut kinaassuseqarnissatsinnut angusaqassalluta

sukataaruteqaqataanikuuvoq.

Tamattaallutalu tamanna angunikuarput.

2008-mi taasissutiginikuarput.

Inuiaat Kalaallit.

Oqaatsit taakku Nunat tamalaanit akuerisatut inatsisissatut naqissuserneqarnikuupput.

”Danskít Nunaanngitsoq”. ”Amerikamiut Nunaanngitsoq”.

Inuiaat Kalaallit Nunaat. Allap nunassarinnngisaa.

Inuiaat nunanit allaneersut tikilluaqqujaannarnikuuagut.

Tikilluaqqusisarnerput piorsarsimassusitsinniittuaannarnikuuvoq.

Tassa Nunap Inoqqaavisut tamaavimmik ilisarnaqutaat. Ileqqorisimasaat. Inuiannik allanik tikilluaqqusineq.

Tamannalu nunasiaataaneq eqqunneqarnerani nunasisullu naqisimannilerneranni atornerlunneqalerpoq.

Kisianni maannakkut nunasiaataaneq qimallugu alloriaqqilerpugut.  
Tunuarsimaarnata nunasisunut maniguunnata namminiussuseqarnissarput  
naalagaaffinngornissarpullu sulissutigivarput.  
Tamanna Namminersorneq pillugu Inatsimmi uatsinnut pisinnaatitaaffittut periarfissatullu  
naqissuserneqarnikuvoq.

Taamaammat siunnersuut una pingaaruteqarluinnarpoq.  
Partiit tamarmik oqaluuserisariaqarpaat qanoq sinaakkusiiniarnersugut.

Naleqqamiit ukiorpaalunni ersarissumik eqqaasitsissutiginikuuarpud siunnersuutip manna  
sammisaa Namminersorneq Pillugu Inatsimmi allaqqareersoq.  
Qinersisinnaaneq naalagaaffinngornissatsinnut attuumassuteqarpoq.

Namminersorneq pillugu Inatsimmi allaqqavoq:

”Kalaallit Nunaata namminiilivinnissaanik aalajangerneq inuiaat kalaallit  
aalajangernerannik tunngaveqassaaq”

Inatsimmi taamatut allassimagami, taava qinersisarneq pillugu inatsit  
unioqqutinneqarsinnaanngitsuusariaqarpoq: Tassagooq, qinersisartut kalaaliusutut  
Inuiaassuseqanngitsut Inuiaat Kalaallit nammineernerulersinnaatitaanissaannut  
akorngusiinnaasumik periarfissaqartussaannngillat.

Taamaattumik Namminersorneq pillugu Inatsimmi allaqqareerpoq Inatsisartunut qinersineq  
Naalagaaffinngornissatsinnut attuumassuteqartoq. Naalagaaffinngornissatsinnullu  
aalajangiisussat tassaapput Inuiaat Kalaallit.

Ersarippoq. Allaqqaqqissaarpoq.

Paragraf 21 piareersarnissaa atuutsilernissaalu Inatsisartut suliarisussaavaat. Tamanna taava  
isumaqarpoq paragraf 21 atuutsilernissaa sioqqungaatsiarlugu Naalagaaffinngornissatsinut  
suliassat ingerlanneqartussaasut.

Tamannalu isumaqarpoq Inatsisartunut qinersisartut Inuiaat Kalaallit  
nammineernerulersinnaatitaanissaannut sunneeqataasartut.

Namminersorneq pillugu Inatsimmi aalajangersimasuugami Inuiaat Kalaallit  
Naalagaaffinngornissatsinnut aalajangiisussaasut taava tamanna aatsaat  
Naalagaaffinngornissatsinnut qinersilerutta atuutsissaguni naapertuutinngilaq.

Naalagaaffinngornissatsinnut aalajangiineq maani Inatsisartut iluani aallartittussaavoq. Taava pingaaruteqarput kikkut amerlanerussuteqarnersut, kikkut naalakkersuisunngornersut kiisalu paragraf 21 atorneqarnissaa aalajangerneqarnersoq.

Taamaattumik apeqqut una pingaaruteqarpoq:  
Inatsisartut qanoq ilusilersorneqassappat? Kikkut ilusilersorneqarnissaannut peqataasussaappat?

Inatsisartut katitigaanerat, qinersisartut tunngavigalugit, Inuiaat Kalaallit nammineernerulersinnaatitaanissaannut killilersuisinnaariaasaassappat, taava § 21 sulii atuutinnginneraniit sunniutaarusinnaavoq.

Aperisariaqarpugut partiit tamarmik qanoq tassuuna inissisimanersut.  
Kikkut qinersisinnaatikkusuppisigit?  
Kalaallit? Danskisut innuttaassusillit? Franskisut innuttaassusillit? Amerikamiutut innuttaassusillit?

Nunarpummi nunarsuarmut ammariartorpoq.  
Naalagaaffinngornissarput qanilliarupallappoq.  
Pingaaruteqarpoq apeqqutit tamakku eqqartussallugit.  
Eqqartunngikkutsigimmi kingunerisaa tassaasinnaavoq allat *Inuiaat Kalaallit qulaallugit* nunarput pillugu aalajangiisinnaalissasut.

Assersuutitut taasinnaavara Ny Kaledonien. Ny Kaledonien-imi Nunap Inoqqaaviusut, Kanak-it, franskit ataani nunasiaatitut naqisimaneqarnikuupput.  
Taakkulu Kanak-it 1970-kkunnili naalagaaffinngorusunnikuupput.  
Ulloq mannalugu Naalagaaffimmut Frankrig-mut sulii atapput.  
Ukiorpassuarni nunasisut amerlanerulersimammata Kanak-it ikinnerussuteqalersimagamik Naalagaaffinngorsinnaanerat aporfilersorneqarsimavoq.

Tassami nunasisut franskit nunaqavissuunngitsut naalagaaffinngornissamut akerliullutik qinersinikkut Kanak-it nammineernerulersinnaatitaanissaannut akorngusiinikuupput.

Tamakku Nunap Inoqqaaviusut allat aqqusaagaat eqqumaffigalugit ilikkagaqarfigisariaqarpagut.

Tamakku aamma ilanngullugit partiit tamarmik qinersisinnaaneq pillugu nalilersortariaqarpaat nassuiarlugu qanoq inissisimanersut



Partiit qanoq inissisimappat? Suli nunatsinni najugaqarneq aallaavigiinnassavarput?  
Taamaassappat qanoq sivilutigisumik maani najugaqartikkusuppisigut qinersisinnaassagunik?  
Ukioq affaq? Ukiut tallimat? Ukiut qulit?

Najugaqaannarneq kikkut kalaaliunerannik aalajangissuussava? Taanna fødestedskriterie-  
unngila nutaaq?

Kalaaleqatigut ukiorpaalunni Danmarkimiinnikuusut imaluunniit ukiorpaalunni nunani  
allaniinnikuusut taakkulu meeraai Kalaaliunngitsutut inissisimassappat? Aali  
kalaaliugaluarlutik?  
Apeqqutit pingaarutillit. Eqqartorniartigit.

Naalackersuisut akissuteqaataanni takusinnaavarput Inuiaat Kalaallit  
nammineernerulersinnaatitaanissaanut unamillernartut taakkartukkakka  
nalilersunngikkaat.  
Ataasinnguamilluunniit Kalaallit pisinnaatitaaffii pillugit eqqaasaqanngillat.  
Inuiattut nammineernerulersinnaatitaanissarput pillugu eqqaasaqanngillat.  
Namminersorneq pillugu Inatsit tungaatigut eqqaasaqanngillat.

Naalackersuisut unamillernartut ajornartorsiutillu kalaallinut sunniuteqangaatsiarsinnaasut  
suliarineqarnissaanut taamak piaareersimanngitsigaat.

Tassagooq qaammatini arfinilinni najugaqarnissamut piumasaqaammik maannakkut  
aaqqiissutaasup ajornartorsiutaanissaanut naammattunik uppernarsaateqannginnami.

Naleqqamiit tamanna tupigusuutigaarput.  
Partiit qanoq isumaqarpat?  
Ukioq affaq najugaqarnissamut naammagivisiuk?  
Namminersorneq pillugu Inatsit malikkusuppisiuk?

Inatsisartut Inuiaat Kalaallit sinniisorivaat. Tamannalu qinersineq pillugu inatsimmi  
tarrasorneqartariaqarpoq. Tarrarsornera ersarittariaqarpoq.

Naleqqami immikkoortiterianiingilagut. Naleqqamiuna Inuaat tamat Inatsisaatigut  
eqqorluartumik timitalersuiniartugut – tassa "Folkeretlig præcision".  
Taakku assigiinneqqissaarput.

Naalagaaffik sorliugaluarpalluunniit Inuiaat allat nammineernerulersinnaatitaanerput  
sutigulluunniit, aamma qinersisarnikkut, akorngusersinnaasussaangikkaluarpaat.



Naleqqami neriuteqarpugut taakkartukkagut sukumiisumik suliaqarfigineqassasut, nunatsinni tamat oqartussaanut nukittunerulersarsinnaagatsigu, Inuiattullu pisinnaatitaaffigut ataqqineqarnissaat qulakkeersinnaallugit. Naleqqamiit oqallineq partiillu tamarmik isumaat tusarnissaat qilanaaraarput.

Qujanaq.